

欽定剿平粵匪方略

欽定勦平粵匪方略卷二百八十一 辛酉年

十二月初十日

癸亥

袁甲三奏言 臣因定

有可乘派遊擊張景春馳赴南路約會團練謀  
結內應期於迅克定城又商李世忠加派守備  
胡占魁前往探詢旋據張景春等回稱十一月  
十八日由開道至定南練總守備吳開會圩復  
與吳開會赴廬境青龍殿把總褚開泰圩內詢

知從前粵逆攻陷廬郡附近居民均被迫脅內  
有吳殿元吳永璧本係良民被脅受賊僞職與  
良民常通信息屢欲投官因四面賊氛難以自  
拔當碇逆張落刑出竄時粵逆僞玲天福高意  
城於前一日入城接守吳殿元等乘機帶眾進  
城作爲助守一面密致褚開泰稟臣約期進攻  
願爲內應當飭臣子編修袁保恆由長淮衛回

營面受機宜會同總兵張得勝帶馬步兵勇三  
千人李世忠亦派守備李丕倬等帶千餘人冒  
雪前往並飛調副都統克蒙額善慶候補道張  
汝梅由北路趕回策應二十三日我軍行抵距  
定遠三十里之婁王楊各圩調集附近團練乘  
夜直抵城下該逆因雪夜無備我軍開礮猛進  
逆膽已寒吳殿元等乘勢告以官兵連營四十

皇朝通志卷之二十一

二

三

四

里勢大難敵高意城亦卽情願納款頃刻東門  
火起內應舉發當飭南路各圩豫備截殺一面  
直趨東關攻擊忽聞城上聲稱官兵業已入城  
守城之賊紛紛逃竄我兵乘勢擁入東門高意  
城首先出城其所帶髮逆猶有巷戰力拒者均  
被殺斃餘賊盡向南門竄去又經南路各民圩  
攔殺斃賊約千餘人敗賊奔赴梁園店埠向廬

郡而去定遠縣城卽於二十四日克復袁保恆  
等入城安撫據擒賊供稱該逆計將久踞以固  
廬郡門戶四眼狗陳玉城約定天晴卽派大隊  
送糧酌量留守吳殿元等備悉賊情是以迅速  
舉事當經袁保恆許以獎勵並令仍回南路密  
約各圩相機規復廬郡次日克蒙額等馬隊馳  
赴南路焚燬賊卡三處直抵廬郡之八斗嶺而

還地方一律肅清狗逆護虛之賊距定遠已在七八十里之外臣查定遠爲九省通衢自粵逆竄踞以來南北聲息不通已歷三年臣上年於攻克鳳陽後派隊進剿自四月至八月大小數百戰業已四面合圍且夕可下旋因狗逆率十餘萬衆分路來援以致功棄垂成今幸吳殿元等不甘被脅密爲內應我軍於風雪嚴寒之中

糾約團練乘夜環偏立將堅城克復從此可冀  
會合楚師共圖掃蕩實爲皖北軍務一大轉機  
除統帶兵勇侍講銜翰林院編修袁保恆係屬  
臣子不敢仰邀議敘外查吳殿元吳永璧內應  
勦賊厥功甚偉遊擊張景春等均屬異常出力  
應先行開列請

旨分別給予獎勵其餘在事出力文武員弁兵勇可



集賢堂  
卷之二  
否准臣擇尤保奏出自

鴻施再據吳永璧稟稱高意城未回廬郡現至護城  
集民圩仍與吳永璧兄弟等糾合各練欲於廬  
郡舉事惟該逆是否真心投誠尙難豫定臣已  
飭令袁保恆隨時酌辦奏入

上命議政王軍機大臣傳諭袁甲三日定遠爲廬郡  
門戶此次袁甲三密約內應並令袁保恆等乘夜

督帶兵練克復堅城調度有方深堪嘉尙卽著撥  
兵駐守嚴密布置並探明楚師駐紮處所妥爲聯  
絡以期進攻廬州至逆首高意城隨吳殿元等一  
併投誠經袁保恆許以獎勵並令仍回南路串通  
各圩於廬郡相機行事卽著責成袁保恆妥爲辦  
理毋失機宜儻能迅克廬州肅清皖北必將出力  
人員論功行賞破格酬庸

上諭內閣曰安徽定遠縣城被粵匪竄踞經袁甲三  
派記名提督張得勝等統帶兵勇攻克定遠縣城  
地方一律肅清所有在事尤爲出力之翰林院編  
修袁保恆著遇有翰詹衙門應升缺出開列在前  
民人吳殿元吳永璧被賊裹脅始終不甘順從卒  
能約爲內應克復城池深明大義甚可嘉尚吳殿  
元吳永璧均著以遊擊儘先補用並賞戴花翎遊

擊張景春著以參將卽補並賞加副將銜守備李  
丕倬胡占魁王學喜均著以都司卽補並賞換花  
翎把總褚開泰守備吳開會均著以都司卽補並  
賞加遊擊銜褚開泰並賞換花翎訓導陶瑞生著  
以知縣不論雙單月遇缺卽選並賞加同知銜賞  
戴藍翎千總曹克宜著以守備卽補並賞戴花翎  
軍功黃承恩著以縣主簿不論雙單月卽選並賞

戴藍翎其餘在事出力文武員弁兵團著袁甲三  
查明保奏毋許冒濫

十二日 乙丑 安徽巡撫彭玉麟奏言 臣 欽奉

諭旨補授安徽巡撫聞

命之下震悚難名 臣 以衡陽諸生父母棄養終鮮兄  
弟少時操習舉業不知韜鈴亦無搏擊之勇徒  
以逆賊猖獗激於義憤遂從帥 臣 曾國藩於軍

旅之中初時創立水師曾國藩以臣愚有膽識  
飭臣同福建提督臣楊載福製造礮船編立營  
哨練習風濤河水之性久而稍諳駕駛與賊轉  
戰湖湘疊荷

先帝鴻恩超擢不次每一除授臣必具稟帥臣自陳才  
力羸疏不諳地方公事請爲代奏開缺曾國藩  
亦深諒臣愚衷非出矯激屢請留辦軍務皆邀

俞允不圖

恩命有加無已臣亦何敢自外

高厚生成伏念封疆大吏有節制文武之權鎮撫軍  
民之責以臣起自我行十年來常居戰艦與水  
勇舵工馳逐於風浪之上一旦身膺疆寄進退  
百僚問刑名不知問錢穀不知深懼弗克勝任  
再四思維惟有顛懇

聖恩准開 臣缺

簡放賢明精幹大員接任安徽巡撫整頓吏治兵事  
使 臣 得以一意辦賊努力前驅 臣 無任悚惶待  
命之至奏入

上命議政王軍機大臣傳諭彭玉麟曰彭玉麟奏向  
帶水師不習吏事封疆任重深恐貽誤請開缺仍  
督帶水師一意辦賊具見真實不欺不染近來官



場沽名釣譽之習深堪嘉許惟安徽全省糜爛非有賢員莫能經理現因一時簡用乏人且該省粵捻紛乘軍情萬分緊急前授彭玉麟爲皖撫仍以督辦軍務爲重係屬用其所長彭玉麟著仍酌帶兵勇前赴安徽接印任事一俟斟酌有人可以接替再行降旨准令該撫開缺專辦軍務此時仍當竭力籌辦以慰廑念

上又命議政王軍機大臣傳諭曾國藩曰彭玉麟管帶水師屢著戰功由諸生蒙

文宗顯皇帝疊加超擢經朕簡任安徽巡撫原以安徽全省糜爛之餘吏治兵事非得賢員莫能整頓彭玉麟駐兵皖境故量才擢用畀任封疆茲覽所奏瀝陳十載戎行於水師稍諳駕駛而刑名錢穀皆非所知深恐於地方公事或有貽誤籲請開缺仍

帶水師一意辦賊足徵真實不欺甚屬可嘉惟安徽巡撫現在簡用乏人本日已諭令彭玉麟仍酌帶兵勇前赴安徽接印任事一俟斟酌有人可以接替再行降旨准令開缺專辦軍務安徽地當緊要彭玉麟隨同曾國藩出兵最久知之必深該撫能否勝任卽著曾國藩據實馳奏如彭玉麟實難勝任並著於所屬司道大員內擇其長於吏治熟

悉軍情者不必拘定資格秉公保奏一二員候旨  
簡放再前任吉南頓甯道沈葆楨前有旨令赴該  
大臣軍營察看保奏本日復諭令慶端傳知該員  
迅速前赴該大臣軍營一俟到營卽著察看該員  
應如何任用之處迅速奏聞

同日慶端瑞瓊奏言浙省平陽會匪勾結粵逆  
窺伺福甯據福甯府知府徐鼐稟稱十月十五

日該匪攻撲分水關並由小路直撲水北溪隘  
口十八日賊分四路來犯都司許忠標總兵陳  
韶舞等督率兵勇奮力截擊我軍正在相持該  
匪另由小路竄入福鼎縣城現在賊氛距福甯  
府城僅百餘里既可旁竄福安甯德並有海道  
可達福州之南台不特福甯各屬均形危急卽  
省垣亦岌岌可虞南台水陸紛歧五方雜處加

以甯紹遷徙之人紛至沓來民心愈滋疑懼臣

慶端奉

旨入浙督師際此全浙糜爛望救孔殷亟應剋日起程親督掃蕩惟閩省北路軍情喫緊省防須亟籌鎮定前陝安鎮總兵秦如虎本令統率兵勇夾攻處州茲飭該總兵挑帶金門兵勇並將遊擊謝曜辰等軍均歸統帶馳赴福甯相機攻勦

恢復福鼎縣城所帶陸提兵一千名水提兵七  
百名興化兵五百名亦令分赴福安甯德壽甯  
三縣設防復飭護閩安協副將吳鴻源酌撥水  
師馳赴東衝駐紮並令同知揭垂謙改赴松溪  
以防處州之賊臣慶端俟北路情形稍鬆省城  
人心略定卽遵

旨赴浙督勦現先添調金門兵丁五百名添募壯勇

一千名責成吳鴻源遴委員弁統帶航海馳赴  
紹興府屬之曹娥劃江而守保衛甯波兼圖克  
復紹興府城一面飛飭總兵林文察統帶台勇  
改由處州進兵催令前皖南道李元度迅由龍  
游進兵以資援勦奏入

上命議政王機軍大臣傳諭慶端曰慶端等奏平陽  
會匪竄陷福鼎距福甯府城不遠且恐各匪圖犯



省垣亟應妥籌兼顧著飭總兵秦如虎等將福鼎一城剋期攻拔毋令該匪深入疊次諭令慶端出省援浙著將省防趕緊布置周妥卽親自督兵入浙援救毋得株守省垣藉口防務置浙事於不問所稱令副將吳鴻源督帶兵勇航海馳赴紹興府屬之曹娥劃江而守保衛甯波是該督尙未知甯波失守之信現在是否可行須令相機辦理且所

派兵勇人數過單亦恐不能得力仍著添派勁旅  
責令進攻以牽賊勢該督務當內顧省防外援鄰  
省不得顧此失彼稍有疏虞前任江西吉南贛甯  
道沈葆楨前經降旨令慶端等傳諭該員赴曾國  
藩軍營聽候該大臣奏請簡用現在是否已經起  
程著卽傳知該員令其迅速前赴曾國藩軍營毋  
稍遲緩

同日吏部兵部奏言欽奉

諭旨因嚴州餘杭失陷省城危急將瑞昌王有齡交  
臣部嚴加議處 臣等遵查 臣部議處官員止於  
革職無可再加應請將杭州將軍瑞昌浙江巡  
撫王有齡均照溺職例議以革職瑞昌應否開  
缺留營效力支食半俸或作爲兵丁效力一併  
聲明請

旨再查餘杭縣城失守欽奉

諭旨署知縣吳滢於該縣失守後仍督率各鄉民團  
力圖克復著暫緩撤任等因 臣等查城池失陷州

縣官例應革職擬罪今署餘杭縣知縣吳滢據  
該將軍等奏請暫緩撤任覈與定例不符相應

請

旨將署餘杭縣知縣吳滢照例議以革職擬罪之處

恭候

欽定奏入

上諭內閣曰杭州將軍瑞昌浙江巡撫王有齡均著  
加恩改爲革職留任其署餘杭縣知縣吳滄前因  
瑞昌等奏該縣失守後仍督率鄉團力圖克復照  
所請降旨暫緩撤任既據該部奏稱覈與定例不  
符吳滄著照部議卽行革職應得失守罪名並著

該部定擬具奏

十四日

丁卯

曾國藩奏言臣奉

命節制浙江全省軍務所有江蘇安徽江西浙江巡撫提鎮以下各官悉歸節制伏念臣自受任兩江以來徽州失守祁門被困竭蹶之狀屢見奏報倖託

聖主威福僅得自全至於安慶之克悉賴鄂軍之功

胡林翼籌畫於前多隆阿苦戰於後並非臣所能爲力江蘇各郡羣盜如毛乃臣職分應辦之事受

命年餘尙無一兵一卒達於蘇境是臣於皖則無功可敘於蘇則負疚良深乃蒙

皇上天恩不責臣以無效翻令兼統浙江軍務並四省巡撫提鎮以下悉歸節制此非常之

寵遇臣自顧菲材實難勝任自九月以來浙省軍情日見危急臣與毓科左宗棠等往復函商援救徒以地段太寬兵力太薄既須援浙又須顧皖保江三省有並重之勢一時乏兼全之策直至十月下旬始定議左宗棠由衢州援浙從正路以張軍威鮑超由甯國進兵從旁路以制賊勢大局所繫必應統籌臣本未敢挂誘不必有節



制浙省之名而後盡心於浙事也前奉

諭旨令浙省提鎮以下均歸左宗棠節制臣已咨催  
左宗棠迅速起行但以臣遙制浙軍尙隔於千  
里之外不若以左宗棠專辦浙事可決於呼吸  
之間左宗棠前在湖南撫臣駱秉章幕中贊助  
軍謀兼顧數省其才實可獨當一面應請

皇上明降諭旨令左宗棠督辦浙江全省軍務所有

該省主客各軍均歸節制毋庸臣兼統浙省額  
懇

天恩收回

成命在

朝廷不必輕假非常之權在臣亦得以少安愚拙  
之分其浙省軍事凡臣思慮所能到才力所能  
及必與左宗棠竭誠合謀不敢稍存畛域如因

推諉而貽誤卽求

皇上按律治罪 臣忝任江督三省巡撫提鎮以下各  
官例得節制載之會典著之

敕書各文武亦經恪遵憲章不必更加申誠至袁甲  
三都興阿各路軍情謹當隨時商辦其江北皖  
北地方文武 臣已嚴飭仍歸該大臣等節制不  
得稍涉玩視 臣惟當與各僚屬同心圖治共濟

艱難伏懇

皇上俯鑒愚忱允臣所請不勝感激悚懼之至

曾國藩又奏言再江蘇浙江地方軍務關繫甚重欽奉

諭旨飭臣酌保堪勝封疆將帥人員臣查蘇浙兩省羣賊縱橫安危利鈍繫於巡撫浙江巡撫王有齡久受客兵挾制難期振作欲擇接任之人自

以左宗棠爲最惟此時杭州尙在圍困之際必  
須王有齡堅守於內左宗棠救援於外應俟事  
勢稍定乃可更動伏求

聖主權衡時勢再降

諭旨至江蘇巡撫一缺目下實無手握重兵之人可  
勝此任查有福建延建邵道遺缺道員李鴻章  
安徽合肥人咸豐三年正月在編修任內奉

旨派同前工部侍郎呂賢基回皖辦理團防在皖北軍  
營六年歷著戰功八年冬閒調赴臣營隨臣周  
歷江西鄂皖三省十年七月初三日臣於保帶  
淮揚水師案內奏稱李鴻章勁氣內斂才大心  
細與沈葆楨二人並堪膺封疆之寄旋因祁門  
危急仍留臣營未赴揚州該員現在臣營統帶  
淮揚水師五千人戰船二百號與總兵黃翼升

會同辦理安慶之克無爲運漕之捷該水軍出力爲多若蒙

聖恩將李鴻章擢署江蘇巡撫該員現統水軍五千臣再撥給陸軍六七千便可馳赴下游保衛一方地方一切事宜該員亦能洞悉利弊至巡撫駐紮之地上海僻在東隅不足以資控制臣愚以爲宜駐紮鎮江北可聯絡淮揚南可規復蘇

常近拊金陵之背遠制洋面但派勁兵數千保  
衛上海留司道一二員經收關稅不必巡撫常  
駐滬城如蒙

俞允應請

密諭飭下李鴻章料理赴任待該員軍抵鎮江後再  
求明降

諭旨至堪勝將帥者臣意中實乏其選臣處所統諸



集事集國大明卷之二十一  
三十一  
將屢見奏報久邀

聖明洞鑒惟綏靖鎮總兵鮑超本年正月破黃汶金  
大股於洋塘五月破劉瑄林大股於赤岡嶺均  
屬非常戰績七八兩月馳驅二千餘里克城破  
敵肅清江西全省厥功尤偉鮑超與李續宜多  
隆阿勳名相等該鎮現當進兵甯國關繫極重  
可否仰沐

特恩獎勵抑或俟諸異日出自

聖裁

曾國藩又奏言臣欽奉

諭旨飭查浙江撫臣王有齡江蘇巡撫薛煥候補鹽  
運使金安清被參各款臣查王有齡前任蘇藩  
其籌餉之才爲遠近所推許上年升任浙撫適  
值金陵師潰蘇常並陷之時敗將逃兵萃於浙

省以萬難整馭之卒又素無統轄之權時勢之  
艱亦爲遠近所共諒然使另練親兵裁汰疲卒  
亦未始不可以主而制客轉弱而爲強王有齡  
不諳軍情但求速效整理尙未就緒卽催令進  
圍嘉興且言嘉郡卽日可克臣於去夏頗以爲  
慮曾奏明嘉興師疲恐生他變厥後嘉興果敗  
王有齡不能嚴叅以治罪嚴州賊退又復冒奏

以飾功於是將玩兵刃遂不可制至本年金華  
之失蘭谿之陷兵團仇殺弁勇擄掠均不能究  
諭旨所詢動受張玉良等挾制係屬實在情形今則  
賊氛環逼餉項久虧即使杭省幸全數萬敗軍  
亦斷非王有齡所能管轄自去夏以來浙餉月  
需三十餘萬大率取之甯波紹興紳民輸將非  
不盡力乃王有齡奏叅團練大臣邵燦立予罷

黜其下委紳數人皆革職永不敘用其所叅者  
並非軍旅之大端但爭體制之末節以致甯紹  
衆紳各懷憤恨外閒相傳有杭兵不許守紹紹  
餉不准入杭之說馴至紹郡淪陷杭省圍困皆  
由官紳水火之所致

諭旨所詢輿論譁然者或由於此近年蘇浙官場陋  
習以夤緣鑽刺爲能以巧猾譎詐爲才王有齡

起自佐雜微員厯居兩省權勢之地往年曾帶  
浙員赴蘇去年又帶蘇員赴浙袒庇私黨多據  
要津其委員派捐但勒限以成數不復問所從  
來委員藉公肥私朘削斂怨勢所不免

諭旨所詢屬吏多貪鄙之徒但以培克貪緣爲事證  
以臣之所聞殆非無因江蘇巡撫薛煥前在蘇  
州府任內頗著循聲在上海道任內辦理關稅

及外國事宜亦臻妥協及擢任巡撫駐紮上海  
陸續募勇四萬餘人每月糜餉二十餘萬不能  
專辦一路之賊江蘇所存地方惟鎮江揚州兩  
處尙據形勢該撫未嘗親至兩郡一行又不能  
多濟餉項以聯聲援上年夏閒薛煥奏請通飭  
各路禁用廣勇而該撫之信任曾秉忠馮日坤  
等所部多係廣勇曾秉忠之勇搶劫洋船釀成

巨案馮日坤之勇在金山圍殺紳首團勇多名  
目無法紀薛煥莫可如何滬城紳民既畏賊蹤  
之環徧又虞兵勇之肆掠日夕驚惶不獲安處  
諭旨所詢帶勇非其所長株守上海莫展一籌三十  
里外卽有賊壘等語臣之所聞大約相符自蘇常  
失陷各縣鎮市流離轉徙萃於上海一隅人民  
財貨中外商賈文武員弁肩摩轂擊地少官多



人浮於事每有差委多由營求而得或並無可派之差亦謀爲位置之法輒復添一謁目給一委札其官職較大者如奏派金安清總辦餉局奏免前藩司蔡映斗首府吳雲失守罪名且委吳雲總辦捐局此數人素工應酬不愜人望其所援引之人類多夤緣之輩

論者所詢官吏奔競如常殆卽此類也上海旣繁盛

異常蘇州之書籍字畫自賊中販賣而出亦充積市肆之中薛煥設立書畫局多延畫工購買名蹟

諭旨所詢日享安富娛情古玩者亦與臣之所聞相同此外別無所聞丁憂候補鹽運使金安清聰明過人好覽書籍惟矜衙智術專工揣摩其辦事廣設方略終鮮成效前因勸捐軍餉款目未

清經袁甲三奏叅赴皖覈算展轉營求始得奏  
派南北籌餉迫通海設局大開幕府煊赫奢侈  
令人向伊捐資投效方得差委爭相賄賂委員  
生監各至百數四出需索民不聊生胥役人夫  
相望於道或派捐富戶關說餽賄即可免捐或  
挾嫌誣指一經傳押必至破家以上三員惟金  
安清才略頗優而物議最劣應請

旨卽行革職撤去籌餉差事不准仍留蘇境以靖人心而息浮言王有齡辦理杭城防務尙費苦心惟用人或尙巧滑取財閒有怨言薛煥倫安一隅物論繁滋蘇浙財賦之區賊氛正熾該二員似均不能勝此重任應否降革之處出自

聖主鴻裁奏入

上命議政王軍機大臣傳諭曾國藩左宗棠曰前因

江浙等省軍情喫緊特諭曾國藩統轄節制以期  
事權歸一茲據該大臣瀝陳各情謂遙制浙軍不  
若以左宗棠專辦浙事請收回成命各等語謙卑  
遜順具見惓忱真摯有古大臣之風深堪嘉尙惟  
左宗棠業經降旨令其督辦浙江軍務並准其自  
行奏事江浙軍情本屬相關一氣凡該大臣思慮  
所到諒無不協力同心相資爲理節制一事該大

臣其勿再固辭杭州孤城圍困已歷數旬本日又據薛煥奏接到王有齡帛書據稱城中民食罄盡兵糧亦已垂竭請山上海豫收經過商人貨稅劃抵兩湖江廣各省每月協餉以資接濟當經諭令薛煥及各該省督撫遵照辦理薛煥奏稱疊次運往糧餉軍火僅有山激浦入繼子壘一路可通亦未知能否運到左宗棠一軍務卽星速馳援總期

早到一日俾杭省早得一日之救曾國藩遵查王  
有齡各款持論平允惟王有齡困於圍城左宗棠  
尚須赴救一時驟難更換俟事定後再降諭旨  
鮑超之軍仍著迅攻甯國以牽賊勢薛煥被叅各  
款亦經該大臣查明得實上海係僻處一隅該大  
臣所籌蘇撫應於鎮江駐紮之處於地勢軍情極  
得要領道員李鴻章既據察看其才可勝重寄著

照所擬卽飭統帶水軍並再由曾國藩撥給陸軍  
六七千馳赴下游與該大臣相爲策應薛煥現在  
辦理通商等事一俟可以移交再降諭旨李鴻章  
到鎮後並著將鎮江一帶水師戰船是否得力兩  
淮鹽務現應如何整頓及運司等能否得力之處  
一併查明由該大臣妥籌具奏至所查金安清種  
種劣蹟尤堪痛恨本日已明降諭旨將金安清革



職前江蘇藩司蔡映斗知府吳雲失守罪名據稱  
均由薛煥奏免不愜人望並著該大臣查明叅辦  
毋任含混

上諭內閣曰曾國藩奏遵查監司大員劣款等語丁  
憂候補鹽運使金安清藉捐肥己聲名甚劣著先  
行革職仍著吳棠派員押赴袁甲三軍營覈算款  
項毋任延宕

曾國藩又奏言 臣疊奉

諭旨飭令保舉人才茲又欽奉

諭旨令保封疆將帥 臣自愧無知人之明無儲才之  
素不足仰答

聖懷惟經濟以歷練而成人才以獎借而出苟有所  
聞卽當搜羅薦達造就爲他日之用去年常州  
之陷守土官吏皆去該郡士民尙能嬰城固守

與賊鏖戰多日城破之後各村鎮團練拒賊如  
無錫蕩口等鎮至今尙與賊相持不懈是其中  
必有二三賢智爲之倡率臣聞該郡素尙節義  
其士子多好讀書稽古研究事理臣所知者有  
候選同知劉翰清監生趙烈文博覽羣書留心  
時事監生方駿謨不求聞達行誼卓然監生華  
蘅芳從九品徐壽研精器數博涉多通此數人

者若令閱歷戎行廓其聞見必可有裨軍謀蔚  
爲時望劉翰清在山東方駿謨在河南其餘尙  
在本籍應請

飭下各省撫臣訪求咨送臣營俟到營數月後悉心  
察看再行出具考語奏請

聖主量材錄用奏入

上命議政王軍機大臣傳諭譚廷襄嚴樹森薛煥左

宗棠曰前因東南軍務需才孔亟以曾國藩久歷  
戎行見聞較廣諭令該大臣擇其堪勝封疆將帥  
之任者酌保數員以備錄用茲據奏稱經濟以歷  
練而成人才以獎借而出去年常州之陷該郡士  
民尙能與賊相持如候選同知劉翰清監生趙烈  
文方駿謨華蘅芳議敘從九品徐壽等使之閱歷  
戎行廓其聞見必可有裨軍謀等語著譚廷襄嚴

樹森左宗棠薛煥卽將各該員速行訪求咨送會  
國藩軍營俾該大臣悉心察看是否均堪造就由  
該大臣分別酌量奏請錄用

同日慶端奏言侍逆李侍賢與忠逆李秀城合  
股由嚴州竄陷紹興分犯杭州續據探報該逆  
於紹興城外加築土城意圖久踞紹興所屬各  
縣惟餘姚一路經郎中謝敬帶勇扼紮曹娥劃

江而守其餘嵎縣新昌均已相繼淪陷查新昌  
北界奉化南接天台路徑紛歧處處皆可竄越  
當此温州土匪方熾處州賊勢漸張若台州再  
有疏虞則閩省北路防不勝防現在台州一路  
已飭在籍江蘇候補道蘇鏡蓉挑選所部勇丁  
備調並飭會同台州府協籌辦團防至甯波一  
路據署甯紹台道張景渠等稟報會商護浙江

提督臣陳世章派撥弁兵馳赴奉化之成功嶺扼險守禦浙省餉路僅甯波一綫之延賊之垂涎已久今新嵎兩縣均失甯波門戶洞開情形危迫臣又添調兵勇遴委大員統帶分由廈門福州航海馳援誠恐緩難濟急准廣西提督臣張玉良咨稱統帶水路兵勇一萬餘人在蕭山之聞家堰紮營其礮船亦已駛至錢塘江瞭望



杭城被圍甚急前皖南道李元度一軍進攻龍  
游未克總兵林文察一軍又爲處州之賊牽掣  
不能越救杭州是以臣前請

飭下曾國藩派令總兵鮑超由甯國就近援杭茲准  
曾國藩咨覆鮑超仍令由池州進攻甯國以分  
浙省賊勢惟江皖擊退之賊現在盡驅入浙杭  
城危在旦夕合無仰懇

天恩飭催曾國藩速派鮑超入浙援剿另派勁旅進  
攻甯國實於大局有裨再太常寺卿左宗棠前  
經杭州將軍瑞昌浙江撫臣王有齡奏請

飭令督辦浙省軍務應否卽令入浙督辦之處伏候  
聖裁所有前請江西援師並湖南鎮筸兵丁一千名  
仍懇

飭下湖南江西督撫臣迅速調派臣現將福甯防剿

事宣布置卽日馳赴督勦奏入

上命議政王軍機大臣傳諭慶端曰前因浙省危急  
慶經諭令慶端馳赴浙閩交界地方相機督勦並  
諭添調臺灣漳泉兵勇由海道赴浙嗣據曾國藩  
奏已飭左宗棠統兵援浙並令鮑超進攻甯國以  
牽賊勢如甯國未復鮑超卽繞道入浙於形勢諸  
多窒礙因令俟克復甯國再行前進慶端徒慕虛

名於軍情地勢未能籌畫合宜且自九月閒已有  
統兵入浙之請至今尙未離閩一步亦未知甯波  
失守之信本日據薛煥馳奏杭郡被圍待援情形  
幾至目不忍覩該督尙以防務緊要等詞粉飾延  
宕當此軍務喫緊該督有兼轄浙省之責如此恇  
怯無能豈能勝任著傳旨嚴行申飭所有臺灣等  
處兵勇是否已飭令由海道援浙所稱添調兵勇

由廈門福州航海馳援是否已飭前往將來左宗棠抵浙得勝賊恐由金衢上竄閩省門戶必應嚴防該督馳赴閩浙交界援浙卽以防閩總當實心辦事如仍蹈從前虛假惡習遷延不肯出省設杭城再有疏虞朕惟該督是問決不寬貸

同日薛煥奏言查杭城被圍甯波失守此時僅有由澈浦入鼈子壘一綫之路可冀與浙省信

息相通十一月二十七日浙江撫臣王有齡寄  
到帛書係初七日所發據稱杭城四面被圍江  
路阻絕城中民食已盡餓斃者三萬餘人兵米  
亦將告罄知臣所解米糧軍火已到江干無路  
可以運進該撫臣在城樓督戰衣不解帶者五  
十餘日近因感冒患瘡仍與文武勦力誓死有  
一日之糧爲一日之守現在挨戶勸捐懸立重

賞選募敢死之士以期速通餉道所有奏明准撥之廣東每月協餉五萬兩江西湖南湖北每月各三萬兩現均無從催取囑臣奏請於中外商人運赴各省貨物過滬時由滬匯繳應納之稅給發收單執赴各該省抵稅扣收協餉卽將所收銀兩隨時購辦米石源源接濟餘銀解杭充餉以救阡危至李元度一軍尙在龍游與賊

相持不能速來該撫臣自十月二十三日繕摺  
拜發之後差弁出城屢被賊阻是以不能具奏  
特繕蠅頭帛書蓋用關防專勇乘夜泗水來滬  
投遞囑臣將大略情形代奏等語又據江蘇候  
補知府趙炳麟稟稱十三日由火輪船裝載銀  
錢軍械拖帶運解火藥等物之船出吳淞口連  
日風潮猛烈船身擱淺以致輪盤受傷行駛不



能自主於十九日飄至甯波之金塘山內洋沙  
綫不熟隆冬潮汎日枯能否收泊澉浦殊無把  
握等語臣查杭州省城被圍業經兩月糧盡援  
絕危急萬分李元度募勇僅有七千而自龍游  
至杭州五六百里一片賊蹤攻入殊爲不易惟  
有願請

飭下太常寺卿左宗棠迅赴浙江督同李元度掃除

龍游富陽之賊直抵杭城以解重圍至臣於三  
次籌解米糧軍火銀錢後趙炳麟續備米糧等  
件委知縣趙景達航海運浙現除趙炳麟領運  
輪船遭風未到外其餘各船未知有無阻滯守  
備張大剛管帶礮船亦未知曾否駛到澈浦現  
距王有齡發信之日又閱兩旬杭城情形未得  
續報臣惟有飛飭確探再行設法接濟王有齡

所請將廣東等省應解協餉在滬籌匯商稅劃抵撥款實屬萬不得已之計合無仰懇

飭下廣東湖南湖北江西各督撫臣迅速籌解浙江協餉一面由臣督同上海關道與中外商人熟籌劃收稅餉以濟要需奏入

上命議政王軍機大臣傳諭薛煥曰浙江省城被賊圍困王有齡所籌於上海中外商人運貨過口先

行納稅給單執赴兩湖江粵各省扣充每月應撥  
浙餉自係於萬難之中設法以期運濟本日業經  
寄諭兩湖廣東江西各督撫遵照辦理昨據曾國  
藩奏已令左宗棠一軍赴援杭州一時尙難卽達  
而杭城呼吸存亡之際非由滬速籌運濟他路更  
屬緩不濟急此時僅有由澈浦入鼈子壘一路可  
通前由火輪船載運軍火銀錢飄至甯波內洋後

能否收泊澉浦該委員有無飾詞須確切查明其  
屢次籌解米糧等件各船與守備張大剛管帶破  
船曾否駛到陸續運入杭城此外有無另籌運送  
糧餉可期速達之處仍著薛煥竭力籌辦務使堅  
城早得接濟以待援師其運貨過滬商人等由滬  
匯繳稅銀給發收單抵稅扣餉一節均照所擬辦  
理並著薛煥收銀後卽設法購辦米石星速解往

仍不得專指此項致稽時日此時杭州萬緊惟恃  
滬瀆一途運濟並著添雇火輪兵船派委智勇將  
弁迅圖援救或有別項海船可以另籌運濟更爲  
妥速著責成該撫竭力籌辦毋得稍存膜視近日  
浙省軍情仍著確探迅速馳奏

上又命議政王軍機大臣傳諭官文勞崇光耆齡毓  
科李續宜毛鴻賓曰薛煥奏杭城四面被圍城中

民食已盡兵米亦將告罄請於中外商人運赴各省貨物過滬時由滬匯繳應納之稅給發收單執赴各該省抵稅扣收協餉卽將所收銀兩由滬隨時購辦米石源源接濟以救阡危各等語此時由滬至杭祇有鼈子壘一路海道可通薛煥節次籌運米糧軍火尙未知能否解到王有齡所籌由滬口豫納商人貨稅給單執赴各該省抵匯協餉一

節自屬萬不得已業由薛煥督同上海關道與中外商民籌辦著官文李續宜毛鴻賓勞崇光耆齡等遵照如有各商由滬運貨到此執持上海此項稅單卽行照數抵充浙省軍餉隨時知照薛煥互相稽覈以資接濟各該省如有海道及他路可通浙省均著各該督撫等盡心籌畫將應解浙省月餉分途撥運務期協餉早到以保堅城毋稍膜視



並將籌辦情形迅速先行具奏

同日賈臻奏言粵逆四眼狗以張落刑爲前導  
前次接應安慶黃州賊衆爲大江礮船堵剿未  
能折回金陵並隨州敗回匪黨號稱二十萬人  
屯聚廬定之交自定遠南路之蔣家巷至壽州  
西南路之三覺寺東西連營七十餘座以其地  
無糧可因意欲棄廬北犯而原踞該郡賊目尙

不肯決然舍去因留數千人死守廬城而自率  
大股渡淮北撲潁州分股徑由淮南掠光固而  
趨信陽訂於本月二十八日與苗沛霖會語臣

查潁州一郡當該逆渡淮北犯之衝欲固潁郡  
之防必須扼淮而守目下兵力過單自懷遠以  
西直抵豫境之烏龍集長淮千里均爲苗黨窟  
宅官兵並無駐足之區竊意今日之事若專以

皖軍禦皖寇未必於事有裨查南路多隆阿一  
軍規取廬州斷難繞越而北袁甲三李世忠等  
固守臨淮未遑兼顧惟豫楚各軍之在西南者  
可以就近扼剿應請

飭下湖北撫臣李續宜速調霍六防兵由六安以北  
節節進剿務將該逆偪而東趨毋使濱臨淮河  
南岸河南撫臣嚴樹森迅撥重兵力扼光固信

陽竄路至淮河北岸未能扼之以兵勢須借力  
於練苗沛霖潘閻等用之可以輔官軍棄之轉  
以助粵逆而欲其樂爲我用則仍非勝保來皖  
駕馭不爲功惟有仰懇

天恩迅飭勝保分兵南下庶皖事尙可挽回臣仍就  
現有兵勇勉力支持斷不敢專待援兵重滋貽  
誤奏入

上命議政王軍機大臣傳諭勝保袁甲三彭玉麟曰  
勝保前次屢請馳赴皖省辦理苗練勦撫事宜因  
北路未經肅清諭令暫緩南下茲據賈臻奏稱潘  
闓等素受該大臣恩誼樂爲之用惟賈臻所請調  
六安防兵現有提督成大吉等統帶未可分調北  
路兵勇前已據勝保飭令成祿等先後撥兵三千  
名馳赴潁州當此曹州等處教會各匪尙未肅清

亦未可再行抽調至豫省勦匪事宜嚴樹森自任  
甚力前已降旨責成該撫會同毛昶熙辦理儘有  
疏虞必將嚴樹森等從重治罪賈臻請飭勝保南  
下情形是否真確著勝保酌量迅速具奏粵逆陳  
玉城前據馮子材等奏稱在鎮江白兔地方屯踞  
何以此次賈臻奏稱該逆又在廬州且在廬定聚  
衆二十餘萬連營七十餘座袁甲三等從未奏及

卽賈臻前次亦無一字馳報如有此等大股賊匪  
豈可任其四竄著袁甲三商同彭玉麟仍遵前旨  
迅卽繞由潁郡進剿以杜北竄